

疫證集說

陸潤庠題籤

疫證集說卷三

集書二十六 選方二十三

嘉定余德馨重校手編

明

推求師意 戴原禮撰

近時因寒熱發作見其指甲青黑遂名曰沙或憂或挑或灌以油茶且禁其服藥此病卽是南方瘴氣生料平胃散加草菓檳榔正其所宜豈有病而無藥者哉

醫學綱目 婁全善撰

凡言運氣皆謂一歲之中長幼之病多相似者俗謂之天行時氣是也

傷寒全生集 陶節庵撰

若四時天令不正感而爲病長幼率皆相似互相傳染者此名時氣

夫時氣者一曰時疫蓋受天行疫癘之氣而爲病乃非傷寒比也然又有溫瘧風溫濕溫毒溫疫中風傷風中濕風濕中暑中喝等症一皆發熱狀似傷寒故醫家通以傷寒稱之其通稱傷寒者因發熱傳變皆相類也至於用藥則不同矣

傷寒蘊要 吳綬撰

大頭者一曰時毒二曰疫毒也蓋天行疫毒之氣人感之而爲大頭也或壯熱氣喘口乾舌燥或咽喉腫痛不利其脈數大者普濟消毒飲主之若內實熱甚者以防風通聖散增損主之大抵治法不宜太速攻則邪氣不伏而反攻內必傷人也且頭面空虛之分邪既着空處則無所不至也所以治法必當先緩而後急則邪伏也凡先緩者且宜清熱消毒如虛人兼益元氣胃虛食少者兼助胃爲主待其內實熱盛大便結以酒浸大黃下之則宣熱而拔其毒也此爲先緩後

急之法也蓋此毒先從鼻腫者次腫於目又次腫於耳從耳至頭上絡後腦結塊則止不散必出膿則愈也

犀角大麥湯

治斑出已盛心煩大熱錯語呻吟不得眠或咽痛不利者

犀角屑

上

大麥

上

玄參

中

甘草

下

升麻

中

黃連

中

黃柏

中

山梔子

中

右用水二鍾煎至一鍾去渣溫服

醫學正傳

虞搏撰

天行一種名曰大頭病俗呼爲狸頭瘟從耳前後腫起名曰蝦蟇瘟從頤頷腫起名曰鷓鴣瘟甚爲凶惡染此者十死八九宜推運氣治之

瘟病初症未端的先以敗毒散治之看歸在何經隨經施治

正傳神朮散

治四時瘟疫專主山嵐瘴氣之妙劑也

蒼朮

三錢

陳皮

厚朴

各二錢

石菖蒲

藿香

甘草

各一錢

加薑棗水煎服

一方無菖蒲有香附子一錢名曰神朮散氣散

加味敗毒散

治瘟疫及發斑

羌活

獨活

前胡

柴胡

川芎

枳殼

桔梗

赤茯苓

人參

防風

荊芥

蒼朮

白朮

赤芍

當歸

生地

薄荷

甘草

薑

棗

水煎服

經驗良方

陳邦憲撰

三仙湯

治山嵐瘴氣時行瘟疫

蒼朮

四錢

乾生地

二錢

牛膝

一錢

水煎服或爲末醋糊和丸梧子大空心酒下三五十丸

明醫雜著

王節齋撰

嶺南春秋時月人感山嵐瘴霧毒氣發爲瘟疫瘧寒熱此毒氣從口鼻入內也

清熱解毒湯

溫暑之月民病天行瘟疫熱病宜清熱解毒氣

羌活

二錢

白芍

人參

石膏

各一錢二分五厘

黃芩

酒炒

知母

酒炒

升麻

乾葛

各一錢

甘草

七分

黃連

酒炒

生地黃

酒洗各五分

剉作一劑薑三片水煎服

韓氏醫通

飛霞子撰

運氣五瘟丹

此方自製冬至日修合

黃芩 乙庚之年爲君

黃梔子 丁壬之年爲君

黃柏 丙辛之年爲君

黃連 戊癸之年爲君

甘草 甲巳之年爲君

此五味各隨運氣爲君者多用一倍也餘四味與香附子紫蘇爲臣者減半也

右七味皆生用爲細末用錦文大黃三倍煎濃湯去渣熬膏和丸如鷄子大用硃砂雄黃等分爲衣貼金每用一丸取泉水浸七碗可服七人凡天行瘟病去處有力之家合以施給陰德無量

萬氏家抄濟世良方 萬密齋撰

痘疹心法曰嘉靖甲午春痘毒流行病死者什八九乃一厄也時有預服三豆子湯絲瓜辰砂散者凡方書所載預解痘毒之法靡不用

之未見效者予竊思痘疹疫癘之毒因歲運災眚之變難以藥解而人事未盡又不可諉之天數也於是檢閱古方乃於韓氏醫通得五瘟丹以五運爲主喜曰此解毒神藥也依方修合施售與人但服之者莫不輕疎人皆神之因命之曰代天宣化丸

疫癘之病乃天地之害氣也天地有斯害氣還以天地所生之物以防備之蓋天食人以五氣地食人以五味合氣味而服之可以祛邪可以解毒古有預防疫病之方不可不知也

凡瘟疫之家自生臭穢之氣所謂傷寒無種氣味相傳者是也當取光明雄黃不拘多少細研以筆濃點鼻孔內兩傍陷中則疫氣不能入雖與病人同床亦不相染也五更洗面後及臨臥點之設若鼻中聞其氣卽便以紙紉入鼻中嚏出之爲佳不爾邪氣上入泥丸宮逐百脉成斯病也以雄黃點之則自不聞其氣并辟諸惡怪夢神良

卷三
四時疫痢宜首用敗毒散加陳皮陳倉米名倉廩湯爲主治又曰有初病挾外感者發熱惡寒身首俱痛此爲表證宜以微汗而解則痢自止如不止者以柴苓湯和之不可遽下遽止也

病疫之人所出之汗所出之便溺無非惡毒之氣或有觸犯者從鼻而入上至腦中流於諸經之中令人染病矣

曾見痘疹後動止出入飲食如常忽然心腹疼痛而死者還是元氣怯弱乘以疫癘之氣正不能勝邪伏于中外若無病內已虧損故一中而死謂之中惡

薛氏醫案 薛立齋撰

時毒因感四時不正之氣致鼻面耳項或咽喉赤腫寒熱頭痛甚者恍惚不寧咽喉閉塞狀如傷寒五七日間亦能殺人

醫學入門 李梴撰

大頭腫又名雷頭風其症頭面腫痛疙瘡甚則咽喉堵塞害人最速冬溫後多有此病

時行疫癘亦能發黃殺人最急

服藥俱宜仰臥使藥氣上行東垣普濟消毒飲最妙人中黃丸亦妙東南兩廣山峻水惡地濕漚熱如春秋時月外感霧毒寒熱胸滿不食此瘴毒從口鼻而入也宜平胃散升麻蒼朮湯神朮散

人中黃丸

治四時疫癘

大黃 黃連 黃芩 人參 桔梗 蒼朮 防風 滑石

香附 人中黃 各等分

右爲末神麴糊丸梧子大每服七十丸

瘴疸丸

治天行病急黃及瘡癰發黃

茵陳 梔子 大黃 芒硝 各一兩 杏仁 六錢 常山 鱉甲

巴豆霜 各四錢 豆豉 二錢

右爲末蒸餅和丸梧子大每三丸或五丸溫水吞下以吐利爲效
不換金正氣散

蒼朮 二錢 厚朴 陳皮 藿香 半夏 甘草 各一錢

薑 三片 棗 二枚

右剉作一貼水煎服

托裏消毒散

治時毒表裏俱解腫尙不退欲其作膿者服之

人參 黃芪 白芍 當歸 白朮 茯苓 陳皮 連翹

銀花 各一錢 白芷 甘草 各五分 水煎服

醫方攷 吳崑撰

升麻葛根湯攷 冬月應寒而反大溫民受其濕厲之氣名曰冬溫
非時不正之氣由鼻而入皮毛未得受邪故無汗

疫瘡五神丸塞鼻法考 以疫氣無形由鼻而入故亦就鼻而塞之
太無神朮散考 山嵐瘴氣謂山谷間障霧濕土敦阜之氣也濕氣
蒸騰由鼻而入呼吸傳變邪正分爭

古今醫鑒 龔信撰

感四時不正之氣使人痰涎壅盛煩熱頭疼身痛增寒壯熱項強睛
疼或飲食如常起居依舊甚至聲啞或赤眼口瘡大小腮腫喉痺咳
嗽稠粘噴嚏

萬病回春 龔廷賢撰

萬曆丙戌余寓大梁梁屬瘟疫大作士民多斃甚至滅門其證增寒

壯熱頭面頸項赤腫咽喉腫痛昏憤名曰大頭瘟余發一秘方名二聖救苦丸用牙皂以開關竅而發其表用大黃以瀉諸火而通其裡一服卽汗一汗卽愈真仙方也稟壯者百發百中虛弱者先服荊防敗毒若未愈用牛蒡芩連湯亦效

二聖救苦丸

大黃

四兩酒蒸

猪牙皂角

二兩

右爲末麪糊丸菴豆大每用五七十丸以菴豆湯送下汗出爲效
牛蒡芩連湯

治積熱在上頭項腫起或面腫多從耳根上起俗曰大頭瘟兼治
啞瘡

黃芩

酒炒二錢五分

黃連

酒炒一錢五分

桔梗

一錢五分

連翹

牛蒡子

微炒

元參

各一錢

大黃

荊芥

防風

羌活

石膏 各一錢五分 甘草 一錢

右剉一劑生薑一片水煎食後細細呷溫服每一盞做二十次服
常令藥在上勿令飲食在後也

加味薑黃丸

治大頭瘟及蝦蟆鷓鴣等瘟

大黃 酒蒸四兩

白佳蠶 二兩

淨蟬衣 六錢五分

薑黃 三錢五分

右爲末神麴糊丸稍加薑汁和勻每兩作十丸大人一丸小兒半
丸蜜水或開水調下立愈

清涼救苦散

治大頭瘟面鼻耳目腫痛

芙蓉葉 白芨 白蘇 車前葉 大黃 黃連 黃柏

白芷 雄黃 赤小豆 芒硝 各等分

右爲末蜜水調敷於腫處頻頻掃上

赤水玄珠 孫東宿撰

大頭病予嘗多加化痰藥於清散之中取效甚速

傷寒舌辨 申斗垣撰

瘟疫之邪初蓄於內宜敗毒散加減或升麻葛根湯

紅色紫瘡瘟疫多有此舌宜解毒湯合益元散加元參薄荷治之尺脉無者死戰慄者亦死

舌紅短有白泡口瘡聲啞咽乾煩燥者乃瘟疫強汗而變此證宜黃連犀角湯三黃石膏湯

醫學六要 張三錫撰

疫病當分天時寒暄燥濕病者虛實安逸因時制宜不可拘泥如久旱天時多燥熱疫流行忌用燥劑宜解毒潤燥天久淫雨濕令大行

脾土受傷民多寒疫多兼瀉利忌用潤藥宜滲濕理脾

壽世仙丹 龔居中撰

紅白散

專治大煩大熱晝夜不退神思昏迷口乾舌燥一切熱症併瘟疫時症並宜

人中白 玄明粉 各一錢 辰砂 五錢

共爲末白沸湯或金銀湯下

外科正宗 陳實功撰

時毒看法 初起寒熱交作頭面一處作腫紅赤發熱疼痛者易已成高腫發熱疼痛有時語聲清朗湯藥易入者輕已潰膿稠堅腫稍消疼痛稍減飲食漸進身溫者吉潰後膿水漸止腫退肌寬神彩精甯睡臥安穩者順初起多寒少熱頭面耳項俱腫光如水晶不熱者

險已成漫腫無頭牙關緊閉湯水不入聲音不出者逆已潰膿水清稀氣味敗臭腫痛不除如尸發胖者死潰後臭水淋漓腫不知痛手足多冷常出謔言者死

時毒治法 寒熱交作頭眩體痛六脉浮緊邪在表也宜汗散之頭面赤腫作痛口燥咽乾大便秘實邪在裡也下之外有寒熱內亦口乾脉弦有力表裡俱實發表攻裡表裡俱解腫痛仍不消者乃瘀血凝滯宜砭去惡血砭血之後腫痛仍作不消者已欲作膿宜托膿健脾腫痛日多而脹痛者已有膿急針之更兼補托脾胃潰後腫痛不減膿清腥穢脾胃弱也更宜溫中健脾饑年時毒流行傳染者忌用攻發當和解宜養正氣

連翹消毒飲

治時毒表裡二症俱罷餘腫不消疼痛不退者